

Visoki predstavnik Christian Schmidt sudjelovao u ključnim razgovorima o stabilnosti i euroatlantskoj integraciji Bosne i Hercegovine na Minhenskoj sigurnosnoj konferenciji 2025



Na Minhenskoj sigurnosnoj konferenciji 2025 (MSC2025), visoki predstavnik Christian Schmidt sudjelovao je u razgovorima na visokom nivou o regionalnoj sigurnosti, reformskom putu i euroatlantskoj integraciji Bosne i Hercegovine. Minhenska konferencija, koja je okupila skoro 450 najviše rangiranih zvaničnika koji kreiraju i donose odluke – uključujući i šefove država, ministre i međunarodne stručnjake za oblast sigurnosti – održana je u ključnom trenutku za globalnu sigurnost.

Visoki predstavnik Schmidt je tokom svojih razgovora istakao potrebu da Bosna i Hercegovina hitno postigne napredak u provođenju ključnih reformi i ojača saradnju sa evropskim i transatlantskim partnerima.

“Stabiliziranje Bosne i Hercegovine zahtijeva provođenje hrabrih reformi i ostvarivanje tijesne saradnje. Dugoročna sigurnost i prosperitet ovise o kredibilnom evropskom

pristupu", rekao je visoki predstavnik.

U okviru MSC2025, visoki predstavnik Schmidt održao je sastanke s komesarom EU za proširenje Martom Kos, ministrom vanjskih poslova Portugala Paulom Rangelom, predsjednikom Češke Petrom Pavelom, ministrom vanjskih poslova Belgije Maximeom Prévotom, ministrom vanjskih poslova Norveške Espenom Barth Eideom, pomoćnikom generalnog sekretara NATO-a Borisom Rugeom i komandantom Komande združenih savezničkih snaga u Napulju admiralom Stuartom Munschom. Visoki predstavnik se također sastao sa predsjedavajućim Minhenske sigurnosne konferencije 2025 Jensom Stoltenbergom, kao i sa predstavnicima američke delegacije. Uz to, visoki predstavnik se sastao sa rabinom Pinchasom Goldschmidtom, predsjednikom Konferencije evropskih rabina, kako bi razgovarao o inkluzivnom rukovođenju i međureligijskom dijalogu, kao i sa Njegovom Svetošću Morom Ignatiusom Aphremom II, patrijarhom Sirijske pravoslavne crkve.

Visoki predstavnik Schmidt je također sudjelovao u ključnim razgovorima o Zapadnom Balkanu, te je naglasio regionalne sigurnosne izazove i važnost trajne međunarodne podrške kako bi se demokratski sistem Bosne i Hercegovine uspješno suočavao sa izazovima.

Kao vodeći forum o globalnoj sigurnosti, Minhenska sigurnosna konferencija nastavlja biti ključna platforma za oblikovanje međunarodne politike i unapređenje budućnosti Zapadnog Balkana i Bosne i Hercegovine.















